



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO



Datë: 22.04.2025

Numër Protokolli: 2727/2025

A.nr.329//2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave, në përbërje nga: Malsore Gashi-Bajraktari, kryetare, Arben Mehmeti dhe Eshref Shabani, anëtarë, me Atdhe Gashi, në cilësinë e procesmbajtësit, në procedurë sipas ankesës me numër A.nr.329/2025, të datës 19.02.2025, të parashtruar nga ankuesi S.M, kundër organit të punësimit/Komuna e Lipjanit, në çështjen juridike “*shkelje e të drejtës në pagë*”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe në mbështetje me dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 22.04.2025, mori këtë:

V E N D I M

Hedhet poshtë si e pasafatshme ankesa me numër A.nr.329/2025, e datës 19.02.2025, e parashtruar nga ankuesi S.M.

A r s y e t i m

Nëpunësi Civil, S.M(*në tekstin e mëtejme referuar: Ankuesi*), me datë 19.02.2025 ka parashtruar ankesë me numër protokolli 1079/2025 në Këshillin e Pavarur Mbikëqyrës për Shërbimin Civil të Kosovës, kundër përgjigjes me Nr.1-120/04/2477 të datës 16.01.2025, të Njesisë për Menaxhimin e Burimeve Njerëzore në Komunën e Lipjanit.

Këshilli i Pavarur Mbikëqyrës për Shërbimin Civil të Kosovës (*në tekstin e mëtejme referuar: Këshilli*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, më datë 26.02.2025 ka proceduar kërkesën për përgjigje në ankesë tek Komuna e Lipjanit, ndërsa kjo e fundit, më datë 03.03.2025 ka përcjellë përgjigjen në ankesë se bashku me shkresat e bashkangjitura të lëndës.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) duke ju referuar shkresave të lëndës të parashtruar nga palët në procedurë ka gjetur se ankesa e datës 19.02.2025, e parashtruar nga ankuesi, **është e pasafatshme**, sepse:

Kolegji i Këshillit nga administrimi i shkresave të lëndës ka gjetur se ankuesi sipas Akt emërimit me 01 Nr.101-03-39383 të datës 09.08.2024, është i punësuar pranë Qendrës për Punë Sociale të Komunës së Lipjanit, gjegjësisht në pozitën e *Zyrtarit për Mirëqenie Sociale- Klasa Profesional 3, Gj44-Koeficient 3.94*.

Rrjedhimisht, nga shkresat e lëndës, rezulton se ankuesi më datë 14.01.2025 ka parashtruar kërkesën për rregullimin e koeficientit brenda klasës në pagë dhe njësisë profesionale, nga klasa Profesional 3 në klasën Profesional 2, tek Njësia për Menaxhimin e Burimeve Njerëzore të Komunës së Lipjanit, e cila më datë 16.01.2025 i ka ofruar ankuesit përgjigjen me Nr.1-120/04-2477, duke theksuar se me gjithë përpjekjet e vazhdueshme për klasifikimin apo kalimin e pozitës Zyrtar për Mirëqenie Sociale në Profesional 2, nga DMZP kjo pozitë nuk është marrë për bazë.

Ankuesi, i pa kënaqur me përgjigjen e lartë theksuar ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin ankimor se është diskriminuar kundrejt kolegëve tjerë që për punë të njëjtë realizojnë të hyra financiare më të lartë, andaj i njëjti kërkon që të aprovohet si e bazuar ankesa dhe të obligohet Kryetari i Komunës së Lipjanit që brenda afatit prej pesëmbëdhjetë (15) ditësh nga dita e pranimi të vendimit, të inicoj veprimet e nevojshme ligjore, për harmonizimin e klasës dhe koeficientit nga klasa Profesional 3 në klasën Profesional 2, duke bërë kompensimin e diferencës së pagës në mënyrë retroaktive dhe atë nga data 01.02.2023.

Kolegji i Këshillit, lidhur me pranueshmerinë e ankesës ju referua dispozitave të Ligjit Nr.08/L-197 për Zyrtarët Publike, përkatësisht nenit 27 paragrafi 3, ku përcaktohet se: 3. *Nëpunësja/i civil ka të drejtë të paraqes ankesë në Këshillin e Pavarur Mbikëqyrës të Shërbimit Civil të Kosovës për çdo veprim apo mosveprim, që i cenon të drejtat apo interesat e ligjshme, të drejta këto që burojnë nga marrëdhënia e punës në shërbimin civil, si dhe dispozitave të Ligjit Nr.05/L-031 për Procedurën e Përgjithshme Administrative, përkatësisht nenit 124 paragrafit 1, ku përcaktohet se: 1. Pala ka të drejtë të ushtrojë mjetet juridike administrative ndaj çdo veprimi apo mosveprimi administrativ, nëse pretendon se të drejtat apo interesat e tij juridike cenohen nga ky veprim apo mosveprim..., ndërlidhur me nenin 127 paragrafi 1 të këtij ligji, ku përcaktohet se: 1. Ankesa duhet të parashtrohet brenda tridhjetë (30) ditëve nga data kur pala është njoftuar për aktin administrativ., dhe si rrjedhojë duke bazuar në kuadrin përkatës ligjor si dhe nga shqyrtimi dhe analizimi i provave të lëndës Kolegji konstatoi se ankesa e parashtruar nga ankuesi, me datë 19.02.2025 është e pasafatshme, ngase ashtu sikurse u tha me lartë në arsyetim të këtij vendimi, ankuesi i pa kënaqur me përgjigjen me Nr.1-120/04-2477 të datës 16.01.2025, të Njesisë për Menaxhimin e Burimeve Njerëzore të Komunës së Lipjanit, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, nga rrjedh se ankesa e datës 19.02.2025 është parashtruar jashtë afatit të përcaktuar me dispozitat e nenit **127 paragrafi 1** të Ligjit Nr.05/L-031 për Procedurën e Përgjithshme Administrative dhe si e tillë është e pa pranueshme në kuptim të nenit 129 paragrafi 1 nën paragrafi 1.3 të Ligjit Nr.05/L-031 për Procedurën e Përgjithshme Administrative.*

Kështu që për sa me sipër dhe duke u bazuar nenin 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të hedhë poshtë ankesën si të pasafatshme, të filluar sipas ankesës me numër A.nr.329/2025 të datës 19.02.2025, si në dispozitiv të këtij vendimi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm, mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.329/2025

Atdhe GASHI

Procesmbajtës

Malsore GASHI-BAJRAKTARI

Kryetare e Kolegjit

Vendimi i dorëzohet:

- Ankuesit S.M;
- Udhëheqëses së Personelit në Komunën e Lipjanit; dhe
- Arkivit të KPMSHCK-së.